

Hong Sawqdiemj Binjbaiz Langhyawj “Denjying Cunghvaz” Youq Gvangjsih Caizgingh Yozyen Biengjbaiz Hailangh

7 nyied 3 hauh, hong sawqdiemj hwnqguh binjbaiz langhyawj “denjying Cunghvaz” buek daih’ it diemj hwnqguh youq Gvangjsih Caizgingh Yozyen Duzsuhgvanej cingqsik biengjbaiz caemhcaiq doiq baihrog hailangh, neix dwg daj bineix 1 nyied 14 hauh Guekgya Minzvej Daengx Guek Siujsiq Minzczu Sawgeq Cingleix Yenzgiusiz yaenqfat 《Aen Dunghcih Gvendaengz Guh Ndei Hwnqguh Sawqdiemj Binjbaiz Langhyawj “Denjying Cunghvaz”》 doxdaeuj, aen diemj hwnqguh daih’ it hong hwnqguh sawqdiemj binjbaiz langhyawj “denjying Cunghvaz” Gvangjsih hailangh, hauh’ ok gij hong hwnqguh sawqdiemj binjbaiz langhyawj “denjying Cunghvaz” cingqsik doek

namh raenhamq. Buek daih’ it giekdeih yenzgiu couqmaenh gij eiqsik Cunghvaz Minzczu ranz vunz ndeu Gvangjsih neix youz Swcigih Minzcunghvej anmingz, Gvangjsih Caizgingh Yozyen baezneix dwkyiengj hong sawqdiemj “cungq daih’ it”, dwg haeujlaeg hagsib gvancez lozsiz gij swhsiengj vunzva Siz Ginbingz, gij swhsiengj youqgaenj gvendaengz gyagiengz caeuq gaijndei hong minzczu Siz Ginbingz cungjsuhgi caeuq gij gidij banhfap 《Yigen Cunghung Cunghyangh Bangunghdingh Goz-vuyen Bangunghdingh Gvendaengz Doicaenh Hong Sawgeq Seizdaih Moq》, muzdiz dwg doenggvaq gauhyau aen cindi youqgaenj beizyangj vunzcaiz caeuq yenzgiu yozsuz neix,

engq ndei doidoengh Cunghvaz conzdungj vunzva maenhndei cauqhuh cienjvaq, cauqhmoq hwnghfat, vih gyavaiq cauxbaenz lizsij swhliu dijhi, gangjah dijhi, lijun dijhi Cunghvaz Minzczu ranz vunz ndeu Cungguek gag guhcawj ok rengz. Binjbaiz langhyawj “denjying Cunghvaz” dwg aen bingzdaiz cienzboq vunzlai caemh yungh comz senhconz yawjsaw, langhbaij okdaeuj, yenzgiu leihyungh, beizyangj vunzcaiz sawgeq gag minzczu youq doxcaez. Hong hwnqguh sawqdiemj aen binjbaiz neix youz Guekgya Minzvej Daengx Guek Siujsiq Minzczu Sawgeq Cingleix Yenzgiusiz gidij cijdauj, gaenjmaenh hopheux diuz sienqmeh couqmaenh gij eiqsik Cunghvaz Minzczu ranz vunz

ndeu, ciuq aen fuengyiengq caezcaemh caeuq doedok “doxyungz” bae guh, gyoebcomz baijok gak loih cwngzgoj okbanj daejyienh leixniemh “haj aen caezcaemh” haenx, gangj ndei gij goj Cunghvaz Minzczu ranz vunz ndeu. Youq ndaw hwnqguh binjbaiz langhyawj “denjying Cunghvaz”, Gvangjsih Caizgingh Yozyen daengj gak aen danhvei caemhguh gungh couzcomz Cunghvaz conzdungj vunzva maenhndei baujhoh yenzgiu cwngzgoj okbanj gungh 1200 cungj suenq miz 1500 cek, vih gyoengq lauxsae hagseng hagsib, sonhag, yenzgiu daezhawj le cingsaenz vunzva swhyenz fungfouq. (Vangz Yigiz/黄誉琦 Cinz Yenfeih/陈燕飞 Liu Gez/廖洁)



▲Gyoengq canghcaepranz yaenglwnh dinfwngz caepranz. Liu Ginhgyauz ingj

2025 Nienz Daengx Gih Lajmbanj Gveihva Gensez Ciendaez Beizyin Youq Gunghcwngz Haidoengh

7 nyied 2 hauh daengz 4 hauh, Gunghcwngz Yauzczu Swciyen Cufangz Caeuq Singzyangh Gensez Giz lienzhab Gvangjsih Cwngzsi Gensez Yozyau youq Gunghcwngz banh 2025 nienz daengx gih lajmbanj gveihva gensez ciendaez beizyinbanh. Baez beizyin neix yungh gij fuengsik gyoebcomz hwnjdangz caeuq saeddieg lienhguh dox giethab, 139 boux canghcaepranz lajmbanj daj Gunghcwngz 9 aen yangh(cin) daeuj camgya beizyin. (Liu Ginhgyauz/廖钦桥 Vangz Yaujginh/黄晓君)

Yungzsuij: Max Doxdaemj Angq Gvaq Ciet Haeux Moq

7 nyied 2 hauh, Yungzsuij Myauzczu Swciyen Anh dai Yangh Mbanjcingsanh guh max doxdaemj doxdax angq gvaq ciet haeux moq, 39 duz max daj Sanhfanz, Yanghfwj, Swyungz, Anhcuiz daengj yanghcin daeuj haenx comz youq giz ndeu, doxdaeuq haenqrem, yienhciengz sing angqriu sing bekwngz mbouj dingz mbouj duenh. (Vangz Cwngz/黄诚)



▲Yienhciengz max doxdik haenqrem.



▲Gyoengqvunz cingq hag guh caz. Couh Hojvwnz ingj

Canghvuz: Boux Cienzciep Feihyiz Coi Caz Canjyez Swnggaep Hwnghfat

7 nyied 6 hauh, Vuzcouh Si Canghvuz Yen Vangfuz Cin aen gunghsw h luzbaujcaz ndawde, boux cienzciep feihyiz luzbaujcaz cingq son vunzlai mbaet caz, langh caz, gangq hawq daengj dinfwngz guh caz. Seizneix, daengx yienh miz boux cienzciep feihyiz 200 lai vunz, daengx yienh ndaem luzbaujcaz 20.5 fanh moux, cunghab canjciz 100 ik maenz, hawj 6.5 fanh vunz ndaejik. (Couh Hojvwnz/周火文 Goz Ginglungz/郭庆龙)